

**КОМПАНИЙН
НИЙГМИЙН
ХАРИУЦЛАГЫН
ТАЙЛАН**

2016



АГУУЛГА

КОМПАНИЙН ТУХАЙ

| | |
|---------------------------|---|
| Эрхэм зорилго, үнэт зүйлс | 3 |
| Товч танилцуулга | 4 |

КОМПАНИЙН НИЙГМИЙН ХАРИУЦЛАГА

| | |
|---|---|
| Компанийн засаглал | 5 |
| Компанийн нийгмийн хариуцлагын бодлого | 6 |
| Оролцогч, сонирхогч талуудын хамтын ажиллагаа | 6 |
| Өргөдөл, гомдол барагдуулах механизм | 7 |
| Орон нутгийн хөгжилд оруулж буй хувь нэмэр | 7 |
| Төсөл, хөтөлбөрүүд | 8 |

АЖЛЫН БАЙР

| | |
|---|----|
| Хүний нөөцийн бодлого, баримтлах зарчим | 12 |
| Ажлын байр, тэгш боломж | 13 |
| Нийгмийн халамж | 14 |
| Шилжилт хөдөлгөөн | 14 |
| Сургалт, хөгжил | 14 |

БАЙГАЛЬ ОРЧИН

| | |
|---|----|
| Байгаль орчны бодлого, баримтлах зарчим | 15 |
| Үйл ажиллагаа | 16 |

ХӨДӨЛМӨРИЙН АЮУЛГҮЙ БАЙДАЛ, ЭРҮҮЛ АХУЙ

| | |
|---|----|
| Хөдөлмөрийн аюулгүй байдал, эрүүл ахуйн бодлого, баримтлах зарчим | 21 |
| Үйл ажиллагаа | 22 |

ТОВЧ ДҮГНЭЛТ

24

ЭРХЭМ ЗОРИЛГО

Бид орчин үеийн техник, технологийг мэргэшсэн боловсон хүчний ур чадвар, хүсэл тэмүүлэлтэй хослуулан Монгол Улсын хөгжил, эдийн засгийн өсөлтөнд хувь нэмрээ оруулна.

АЛСЫН ХАРАА

Бид олон улсын зах зээл дээр нүүрс, нүүрсэн бүтээгдэхүүн борлуулах дэлхийн хэмжээний үйл ажиллагаатай үйлдвэрлэгч компани болно.

ҮНЭТ ЗҮЙЛС

Ажиллагсад, боловсон хүчин манай компанийн амин чухал зүйл гэж бид үздэг, иймд:

- Энержи Ресурс ХХК нь хөдөлмөрийн аюулгүй байдал, эрүүл ахуйн орчинд нэн тэргүүнд анхаарна.
- Энержи Ресурс ХХК нь ур чадвар, ажлын үр дүнг харгалзсан хөдөлмөр эрхлэлтийн адил тэгш боломжоор хангаж хариуцлагатай ажил олгогч байна.

Орчин үеийн өндөр үр өгөөжтэй техник технологи нь Монгол Улсад хөгжил дэвшил авчирна гэдэгт бид итгэдэг, иймд:

- Энержи Ресурс ХХК нь сайн чанарын бүтээгдэхүүн үйлдвэрлэдэг дэлхийн түвшний нүүрсний уурхай байгуулж хөгжүүлнэ.
- Энержи Ресурс ХХК нь Монгол Улсын нүүрс олборлолтын салбарт техникийн шинэ стандарт тогтоохыг зорино.

Бид байгаль орчны хариуцлагатай уурхайн үйл ажиллагаа явуулдаг, иймд:

- Энержи Ресурс ХХК-ийн уурхай, дагалдах инженерийн бүтцийг байгаль орчинд аль болохоор бага нөлөөлөл учруулахаар зохион байгуулна.
- Энержи Ресурс ХХК нь шаардлагатай бүх байгаль орчны стандартуудыг мөрдөж, байгаль орчинд учирч болзошгүй нөлөөллийг бууруулах, урьдчилан сэргийлэхэд чиглэсэн арга хэмжээнүүдийг авна.

Бид нийгмийн хариуцлагатай уурхайн үйл ажиллагаа явуулдаг, иймд:

- Энержи Ресурс ХХК нь иргэд, засаг захиргааны байгууллага, харилцагч, нийлүүлэгчидтэй “сайн хөрш”-ийн харилцааг хөгжүүлнэ.
- Энержи Ресурс ХХК нь иргэдэд чиглэсэн бодлого, хөтөлбөрүүдээр дамжуулан нийгмийн хөгжилд хувь нэмрээ оруулна.

Компанийн сайн засаглал нь Энержи Ресурс ХХК-ийг ажиллуулах, удирдах, хяналтыг хэрэгжүүлэх үзэл баримтлал гэж бид үздэг, иймд:

- Энержи Ресурс ХХК нь олон улсын шилдэг туршлагыг үйл ажиллагаандаа нэвтрүүлнэ.
- Энержи Ресурс ХХК нь компанийн засаглалын соёлыг байгууллагынхаа хөгжлийн салшгүй хэсэг болгон мөрдөнө.

КОМПАНИЙН ТУХАЙ



ТОВЧ ТАНИЛЦУУЛГА

Энержи Ресурс ХХК нь 2005 онд байгуулагдсан үндэсний хөрөнгө оруулалттай уул уурхайн компани бөгөөд Өмнөговь аймгийн Цогтцэций сумын нутаг дахь Ухаа Худаг нүүрсний уурхайд үйл ажиллагаа явуулдаг. Монголын үндэсний компаниудаас анх удаа 2010 оны 10-р сард Хонконгийн хөрөнгийн биржид амжилттай IPO хийж, олон улсын хөрөнгийн зах зээлд хувьцаагаа гаргасан нээлттэй хувьцаат компани бөгөөд нийт хувьцааны 60 орчим хувийг үндэсний хөрөнгө оруулагчид эзэмшдэг.

Өнгөрсөн хугацаанд Энержи Ресурс компани нийт нэг их наяд гаруй төгрөгийг уурхайн болон дагалдах дэд бүтцийн төслүүдэд хөрөнгө оруулалт хийхэд зарцуулсан төдийгүй 2009 онд үйл ажиллагаагаа эхлүүлснээс хойш өнөөдрийг хүртэлх хугацаанд 818 тэрбум төгрөгийг татвар, шимтгэл хэлбэрээр улсын төсөвт төвлөрүүлжээ.

Мөн тус компани байгуулагдсан цагаасаа хойш орон нутгийн иргэдтэй сайн хөршийн харилцааг хөгжүүлж, нээлттэй өдөрлөг, хэлэлцүүлэг зохион байгуулах замаар олон нийтийн санал бодлыг төсөл хэрэгжилтийн явцад тусгаж ирсэн бөгөөд жил бүр ойролцоогоор нэг тэрбум гаруй төгрөгийг зөвхөн орон нутгийг хөгжүүлэх, чадавхижуулах төсөл, хөтөлбөрүүдэд зарцуулж ирсэн. Түүнчлэн Ухаа Худаг төслийн хүрээнд дотоодын нийт 3,000 гаруй байгууллага, аж ахуйн нэгжтэй туслан гүйцэтгэгч, бэлтгэн нийлүүлэгч хэлбэрээр идэвхтэй хамтран ажиллаж ирсэн байна.

Энержи Ресурс компани нь нэмүү өртөг шингэсэн, сайн чанарын коксжих нүүрс, нүүрсэн бүтээгдэхүүнээр олон улсын зах зээлд өрсөлдөн, Монгол Улсын хөгжил, дэвшил, үйлдвэржилтэд бодитой хувь нэмрээ оруулан ажиллаж байна.

КОМПАНИЙН НИЙГМИЙН ХАРИУЦЛАГА



КОМПАНИЙН ЗАСАГЛАЛ

Энержи Ресурс компани нь олон улсын хөрөнгийн зах зээлд хөл тавьсан, нээлттэй хувьцаат компани гэдэг утгаараа компанийн засаглалыг байгууллагын хөгжлийн чухал үзэл баримтлал гэж үздэг бөгөөд хувь нийлүүлэгчдийн эрх ашиг, тэдгээртэй адил тэгш харьцах зарчим болон мэдээллийн ил тод байдлыг хангах чиглэлд онцгой анхаарал хандуулж ирсэн.

Компанийн сайн засаглалыг төлөвшүүлэх нь манай компанийн хувьд дэлхийн жишигт нийцсэн уул уурхайн үйлдвэрлэлийн цогцолбор байгуулан, улсдаа тэргүүлэгч аж ахуйн нэгж байх гол тулгуур хүчин зүйл гэж бид үздэг.

Энэ бодлогын хүрээнд дотоодын болон олон улсын хэмжээнд мөрдөгддөг, сайн засаглалын шаардлагуудыг биелүүлэн ажилладаг төдийгүй нээлттэй, ил тод, хариуцлагатай байдал, шийдвэр гаргалтын энгийн, түргэн шуурхай орчныг бүрдүүлж, дотоодын дүрэм, журмуудын хэрэгжилтийг ханган ажилладаг.

Бид хүний эрхийг дээдэлж, үйл ажиллагааныхаа хүрээнд орон нутгийн иргэдийн болон ажиллагсдынхаа эрхийг зөрчихгүй байх талаар анхаарч ажилладаг төдийгүй хүний эрхийн эрсдлийн үнэлгээг хийж, түүний дагуу хөтөлбөр боловсруулж, сургалт зааварчилгааг холбогдох ажиллагсаддаа тогтмол өгдөг.

Түүнчлэн оролцогч, сонирхогч талуудын итгэлийг хүлээх үүднээс нээлттэй, ил тод үйл ажиллагаа явуулахыг эрхэмлэн ажилладаг. Энэ хүрээнд үйл ажиллагаагаа олон нийт, хөрөнгө оруулагчид болон бусад төр засаг, олон улсын банк санхүүгийн байгууллагуудад нээлттэй тайлагнасаар ирсэн. 2009 онд үйл ажиллагаагаа эхлүүлснээс хойш Олборлох Үйлдвэрлэлийн Ил Тод Байдлын Санаачилга (ОУИТБС)–д нэгдэн, төр засгийн байгууллагад төлсөн төлбөр, татвар хураамжаа жил бүр ил тод, нээлттэй тайлагнаж, хариуцлагатай уул уурхайг хөгжүүлэх үйлсэд нэгдэн ажиллаж байна.

КОМПАНИЙН НИЙГМИЙН ХАРИУЦЛАГЫН БОДЛОГО

Энержи Ресурс компанийн хувьд Компанийн нийгмийн хариуцлага (КНХ) гэх ойлголтыг дан ганц хандив, тусламж юмуу богино хугацааны төсөл, хөтөлбөрүүд гэх мэт хязгаарлагдмал хүрээнд авч үздэггүй бөгөөд олон улсын болон Монгол Улсын холбогдох хууль тогтоомжуудын хүрээнд хариуцлагатай уул уурхайн зарчмуудыг хэрэгжүүлж, нийгмийн сайн сайхан, улс орны эдийн засгийн хөгжилд урт хугацааны, бодитой хувь нэмэр оруулах замаар тогтвортой хөгжлийн бат бэх суурь бий болгохыг зорьдог.

Иймд Олон Улсын Стандартын Байгууллагаас 2010 оны 10-р сард гаргасан “ISO26000: Нийгмийн хариуцлагын зөвлөмж” болон Олон Улсын Санхүүгийн Корпораци, Европын Сэргээн Босголт Хөгжлийн Банк зэрэг байгууллагуудаас гаргасан удирдамжуудад үндэслэн КНХ-ын бодлогоо боловсруулан батлуулж, үйл ажиллагаандаа тусган хэрэгжүүлж ирсэн.

Орон нутгийн тогтвортой хөгжлийг дэмжих, нийгмийн

суурь бүтцүүдийг тогтворжуулахад дэмжлэг үзүүлэх зорилгын хүрээнд дэд бүтэц, эрүүл мэндийн үйлчилгээний хүртээмжийг сайжруулах, боловсролыг дэмжих, соёлын өвийг хамгаалах, жижиг дунд бизнесийг дэмжих үндсэн чиглэлүүдээр төсөл, хөтөлбөрүүд хэрэгжүүлж байна.

Энэхүү хөтөлбөр, төслийн хүрээнд иргэд, оролцогч талуудтай зөвлөлдөх, компанийн үйл ажиллагааны талаар үнэн зөв мэдээллийг түгээх, орон нутгийн иргэд, оролцогч талуудаас ирсэн санал гомдлыг барагдуулахад анхааран ажилладаг.

Өнөөдөр тус компани нь уул уурхайн салбарын хэмжээнд КНХ хэрэгжүүлэгч шилдэг компанийн нэгээр зүй ёсоор нэрлэгдэж, оролцогч талуудынхаа итгэлийг хүлээн, нийгмийн зөвшөөрлөө ханган, улс орны болон орон нутгийн тогтвортой хөгжилд өөрийн бодит хувь нэмрээ оруулан ажиллаж байна.

ОРОЛЦОГЧ, СОНИРХОГЧ ТАЛУУДЫН ХАМТЫН АЖИЛЛАГАА

Компани нь оролцогч болон сонирхогч талуудтай харилцан ашигтай хамтын ажиллагааг бий болгох, мэдээлэл туршлага солилцох, үйл ажиллагаандаа хөндлөнгийн мониторинг үнэлгээ хийлгэх, үйл ажиллагаагаа тайлагнах зэргээр гадаад дотоодын олон байгууллагатай үр өгөөжтэй хамтран ажиллаж байна. Энержи Ресурс компани нь оролцогч, сонирхогч талуудыг татан оролцуулах төлөвлөгөөг 2009 оноос эхлэн хэрэгжүүлсэн. Энэхүү төлөвлөгөөнд дараах үндсэн зарчмуудыг тусгасан байдаг:

- Орон нутгийн иргэд Ухаа Худаг төслийн талаар мэдээлэл авах эрхийг хангаж ажиллах;
- Бодлого, төлөвлөлтөндөө оролцогч, сонирхогч талуудын санал хүсэлтийг тусгах зарчмыг баримтлан, үр дүнтэй хэлэлцүүлгийг аливаа шахалт дарамтгүйгээр, шударгаар явуулах;
- Үйл ажиллагааныхаа нийт хугацааны туршид оролцогч, сонирхогч талуудын оролцоог хангах үйл ажиллагааг тогтмол явуулах;
- Иргэдийн санал хүсэлт, гомдлыг хүлээн авах, шийдвэрлэх механизмыг бий болгон хэрэгжүүлэх.

Энэ дагуу компанийн үйл ажиллагааны талаар үнэн, зөв мэдээлэл түгээж, иргэдтэй нүүр тулж уулзан, тэдний санал зөвлөмжийг үйл ажиллагаандаа тусгах зорилгоор Монголын уул уурхайн салбарт анх удаа нээлттэй өдөрлөг, олон нийтийн хэлэлцүүлгийг 2009 оноос эхлэн жил тутам зохион байгуулж ирсэн.

Мөн орон нутгийн иргэдтэй нээлттэй харилцааг хөгжүүлж, шийдвэр гаргах явцад тэдний оролцоог хангах, дуу хоолойг тусгах үүднээс Цогтцэций, Баян-Овоо, Ханбогд сумдад орон нутгийн сайн дурын зөвлөл байгуулан тууштай



хамтран ажиллаж байна.

Компаниас тус зөвлөлүүдтэй сар бүр уулздаг бөгөөд зөвлөл тус бүр малчид, өрх толгойлсон эмэгтэйчүүд, сумын Иргэдийн Төлөөлөгчдийн Хурлын гишүүд, орон нутгийн төрийн бус байгууллагууд болон хөгжлийн бэрхшээлтэй иргэд, ахмадын төлөөлөл зэрэг 9–11 хүний бүрэлдэхүүнтэйгээр ажилладаг. Ингэснээр зөвлөл нь нутгийн иргэдийн дуу хоолой болж, тэдний санал зөвлөмжийг компанид уламжлах замаар компани болон иргэдийн хооронд нээлттэй, эрх тэгш оролцоог хангах, хамтын ажиллагаа хөгжих боломжийг нэмэгдүүлж байна.

Малчид, иргэдийн зүгээс компанийн бүтээн байгуулалтын ажлууд болон байгаль орчны мониторинг, нөхөн сэргээлтийн ажилд сайн дурын хяналт тавих байдлаар оролцдог нь компани ба иргэд хоорондын харилцан ойлголцол, итгэлцлийг нэмэгдүүлэхэд эергээр нөлөөлж байна.

ӨРГӨДӨЛ, ГОМДОЛ БАРАГДУУЛАХ МЕХАНИЗМ



Компанийн үйл ажиллагааны улмаас хүний эрх, эрүүл мэнд, аюулгүй байдал, байгаль орчинд үүсч болзошгүй аливаа сөрөг нөлөөллийг тухай бүр илрүүлж, цаг тухайд нь арга хэмжээ авч байх зорилгоор орон нутгийн иргэд болон ажиллагсдаас ирсэн гомдлыг хүлээн авч шуурхай шийдвэрлэж эргэн мэдээлэх журмыг хэрэгжүүлэн ажилладаг.

Энэ журмын хүрээнд аливаа өргөдөл, гомдол, хүсэлтийг хүлээн авсан өдрөөс хойш 30 хоногийн дотор хариу өгч, шаардлагатай болон хүсэлт гаргасан тохиолдолд гомдлын нууцлалыг хадгалах ба бүх гомдолд ижил тэгш

зарчмаар хандан ажилладаг. Өргөдөл гомдол, санал хүсэлтийг утсаар, цахим шуудангаар, бичгээр болон иргэдтэй биечлэн уулзах байдлаар хүлээн авдаг.

2016 онд компанийн хэмжээнд нийт 30 хүсэлт хүлээн авсан байна. Эдгээр хүсэлтийн 63% нь компаниас хандив, эд материалын тусламж хүсэх тухай, 7% нь Ухаа Худаг уурхай болон Галлерей кэмпийн үйл ажиллагаатай танилцах тухай, 7% нь худаг ус гаргуулах болон Наймдайн хөндийн гүн өрмийн худгийг ашиглах тухай байсан бол үлдсэн 3.5% нь бараа, бүтээгдэхүүн нийлүүлэх, гэрээ байгуулах, хамтран ажиллах, цахилгаан холбуулах, ажилд орох зэрэг хүсэлтүүд байлаа.

Нийт саналын 90.4%-ийг 30 хоногийн дотор шийдвэрлэж, тухай бүр хариу өгсөн байна. Компани 2011 онд Өргөдөл, гомдлыг хүлээн авах, шийдвэрлэх журам боловсруулж, хэрэгжүүлж эхэлснээс хойших зургаан жилийн хугацаанд буюу анх удаа иргэдээс ямар нэгэн гомдол ирээгүй нь тайлант 2016 оны онцлог байлаа.

Өөрөөр хэлбэл, жил ирэх тусам ард иргэдээс ирэх гомдлын тоо багасч, санал хүсэлтийн тоо нэмэгдэж байгаа нь компанийн зүгээс хариуцлагатай уул уурхайн зарчмуудыг бодитой хэрэгжүүлж, нээлттэй, олон талт харилцааг хөгжүүлэн ажиллаж ирсний бодит үр дүн юм.


ОРОН НУТГИЙН ХӨГЖИЛД ОРУУЛЖ БУЙ ХУВЬ НЭМЭР

Энержи Ресурс компани нь 2009 онд үйл ажиллагаа эхлүүлснээс хойш татвар төлөлтөөр улсдаа тэргүүлж, улс орны хөгжил, эдийн засгийн өсөлтөнд бодит хувь нэмрээ

оруулж ирсэн.

Тодруулбал, 2009–2016 он хүртэлх хугацаанд нийт 818 тэрбум төгрөгийг улсын төсөвт төвлөрүүлсэн байна.

Татвар төлөлт /тэрбум төгрөгөөр/



2016 онд уул уурхайн салбарын хувьд хямрал үргэлжилсэн, хүндхэн жил байсан боловч компанийн зүгээс дотоод нөөц бололцоогоо дайчлан ажилласны үр дүнд нийт 53 тэрбум төгрөгийн татварыг улсын төсөвт төвлөрүүлжээ.

Орон нутаг төдийгүй улс орны хэмжээнд хөгжлийн чухал хөшүүргүүдийн нэг нь дэд бүтцийн асуудал байдаг. Энержи Ресурс компани үйл ажиллагаа явуулж эхэлснээс хойш Ухаа Худагт өргөн цар хүрээтэй бүтээн байгуулалтыг өрнүүлж, уурхай дагасан дэд бүтцийн шийдлийг цогцоор бүрдүүлсэн. Тухайлбал, Монгол инженерүүдийн ур ухаанаар дулааны цахилгаан станц, усан хангамжийн систем барьж байгуулснаар орон нутгийн иргэд 24 цагийн найдвартай эрчим хүч, цэвэршүүлсэн усаар хангагдах болсон.

Мөн орон сууцны “Цэций” хороолол, сургууль цэцэрлэгийн “Мөрөөдөл” цогцолборыг барьж байгуулснаар ажиллагсад болон орон нутгийн иргэд ая тухтай амьдрах, хүүхэд багачууд говийн алслагдмал суманд ч тохилог

орчинд, чанартай боловсрол олж авах нөхцөл боломж бүрдсэн. Тайлант онд нийт 2.4 тэрбум төгрөгийг орон нутгийн дэд бүтэц болон орон нутгийн тогтвортой хөгжлийг дэмжихэд чиглэсэн төсөл хөтөлбөрүүд, холбогдох бусад ажлуудад зарцуулсан байна.

Орон нутгийн тогтвортой хөгжил, эдийн засгийг дэмжих нэг хэлбэр нь орон нутгийн аж ахуйн нэгж, иргэдээс бараа бүтээгдэхүүн худалдан авах явдал юм. Компанийн зүгээс бараа бүтээгдэхүүн худалдан авахдаа бизнесийн шударга зарчмыг баримталж, орон нутгийн бизнес эрхлэгчидтэй хамтрахыг нэн тэргүүнд зорьдог.

Өнгөрсөн онд нийт 117 аж ахуйн нэгжээс хэрэгцээт бараа, үйлчилгээ худалдан авснаас 94 хувь нь үндэсний компаниуд байсан бол Өмнөговь аймаг буюу орон нутгийн хэмжээнд 27 аж ахуйн нэгжээс нийт 140 орчим сая төгрөгийн бараа материал, ажил үйлчилгээний худалдан авалт хийжээ.

Нийгэм, орон нутагт оруулсан хөрөнгө оруулалтын дүн /2016/

| ХӨРӨНГӨ ОРУУЛАЛТЫН ЧИГЛЭЛ | төгрөг |
|--|----------------------|
| 1. Орон нутгийн дэд бүтцийн хөгжил | 1,766,211,277 |
| 2. Орон нутгийн хөгжлийг дэмжих төсөл, хөтөлбөрүүд | 372,447,374 |
| 3. Хандив, тусламж | 75,620,813 |
| 4. Орон нутгийн худалдан авалт | 137,053,350 |
| Нийт | 2,351,332,814 |

ТӨСӨЛ, ХӨТӨЛБӨРҮҮД

Энержи Ресурс компани нь нийгмийн нөлөөллийн үнэлгээ, хүн ам, эрүүл мэнд, хүний эрх, соёлын өв зэрэг нийгмийн олон чиглэлийн суурь судалгаа болон иргэдийн нээлттэй хэлэлцүүлгийн санал санаачлагыг үндэслэн орон нутгийн тогтвортой хөгжлийг дэмжих төсөл, хөтөлбөрүүдийг орон нутгийн иргэд, олон нийт болон засаг захиргааны байгууллагуудтай хамтран хэрэгжүүлдэг.

Мөн иргэд, засаг захиргааны байгууллага, харилцагч, нийлүүлэгчидтэй “сайн хөрш”-ийн харилцааг эрхэмлэж,

малчин өрхүүдэд өвөл, хаврыг өнтэй давахад нь дэмжлэг болгон өвс тэжээлийн тусламж үзүүлэх, сар шинээр өндөр настуудад гарын бэлэг гардуулах зэрэг ажлуудыг жил бүр уламжлал болгон зохион байгуулсаар ирсэн.

2016 онд салбарын зах зээлийн нөхцөл байдлаас хамааран компани бүрэн хүчин чадлаараа ажиллаагүй хэдий ч нийгмийн өмнө хүлээсэн үүргээ ухамсарлаж, орон нутгийн тогтвортой хөгжлийг дэмжих төсөл, хөтөлбөрүүдээ тууштай үргэлжлүүлж ажиллалаа.

МАЛЧДЫН ТОГТВОРТОЙ АМЬЖИРГААГ ДЭМЖИХ ХӨТӨЛБӨР

Уул уурхайн эрчимтэй хөгжилтэй зэрэгцэн уламжлалт мал аж ахуй эрхлэгч малчин өрхийн амьжиргааг сайжруулах, тэдний бизнес эрхлэлтийг дэмжих хүрээнд “Малчдын тогтвортой амьжиргааг дэмжих” хөтөлбөрийг 2012 оноос санаачлан хэрэгжүүлж ирсэн.

Өнгөрсөн хугацаанд хөтөлбөрт хамрагдах Цогтцэций, Баян-Овоо, Ханбогд сумдын малчдын дунд нийгэм-эдийн засгийн судалгаа хийж, малчдын амьжиргааны өнөөгийн нөхцөл байдал, аж ахуй эрхлэх сонирхол, чадавхи, эрэлт хэрэгцээг тодорхойлсон.

Мөн судалгааны үр дүнд үндэслэн цаашид эрхлэх бизнесийн чиглэлийг хамтран тодорхойлж, төсөл боловсруулж, жижиг дунд бизнесийг эрхлэхэд тус болохуйц төрөл бүрийн чадавхижуулах сургалтанд хамруулан ажилласан.

Төслийн хүрээнд Хас банктай хамтран уурхайн нөлөөллийн бүсийн малчин өрхүүдэд бичил зээл олгох хөтөлбөрийг эхлүүлж, Цогтцэций, Баян-Овоо, Ханбогд сумын нийт 15 малчин өрхөд хөнгөлөлттэй зээл олгон, өрхийн бизнест нь дэмжлэг үзүүлсэн.



Малчдад зөвхөн зээл олгож санхүүгийн дэмжлэг үзүүлээд зогсохгүй тэднийг өрхийн бизнесээ өдөр тутам хөтлөн явуулах, мэдлэг, мэдээллээ сайжруулахад нь мэргэжлийн дэмжлэг туслалцаа үзүүлэх зорилгоор орон

нутгийн “Амжилтын томъёо”, “Говийн хөгжлийн зуун” ТББ-уудтай хамтарч, бизнесийн зөвлөх үйлчилгээ, сургалт, семинаруудыг зохион явуулсан.

Тайлант онд төслийн хуваарийн дагуу эхний ээлжинд зээл авсан 15 малчин өрх зээлийн эргэн төлөлтөө бүрэн хийж дууссан байна. Малчид зээлийн санхүүжилтээ мал аж ахуй эрхлэх, мал худалдаж авах, газар тариалан эрхлэх, хүнсний ногоо тариалах, мужааны цех, дугуй засвар, хүнсний дэлгүүр, махны цех, цайны газар ажиллуулах зэрэг бизнес эрхлэхэд зарцуулсан бөгөөд өрхийн орлого нь тодорхой хэмжээгээр нэмэгдэн бодит үр өгөөжөө өгснийг төслийг хамтран хэрэгжүүлэгч Хас банк болон ТББ-ууд онцолж байлаа. Цаашид компанийн зүгээс уг төслийг иргэдийн бичил бизнесийг дэмжих чиглэлд, цар хүрээг нь өмнөхөөс тэлж үргэлжлүүлэн хэрэгжүүлэхээр төлөвлөж байна.

СУМ ДУНДЫН ЭМНЭЛГИЙН ХҮЧИН ЧАДАВХИЙГ САЙЖРУУЛАХ ХАМТЫН АЖИЛЛАГАА

Энержи Ресурс компани Өмнөговь аймгийн Цогтцэций сумын сум дундын эмнэлэгтэй хамтын ажиллагааны гэрээ байгуулан ажилласнаар нийгмийн хариуцлагынхаа хүрээнд нийт 312 сая төгрөгийн өртөг бүхий мэс засал болон яаралтай тусламжийн хэрэгсэл, лабораторийн тоног төхөөрөмж, оффисын тавилга хэрэгсэл, компьютер зэргийг буцалтгүй тусламж болгон олгосон.

Ингэснээр тус эмнэлгийн тусламж, үйлчилгээний чанар хүртээмж сайжирч, эмч ажиллагсад болон үйлчлүүлэгчдэд ая тухтай таатай орчин бүрдсэнээс гадна лабораторийн шинжилгээний нэр төрөл нэмэгдэж, гематологийн аппаратаар 460 гаруй шинжилгээ, биохимийн анализатор аппаратаар 520 гаруй шинжилгээ хийжээ. Ард иргэдийн амь насыг аварч, эрүүл мэндийн тусламж үзүүлэхэд хэрэгцээ, шаардлагатай эмнэлгийн багаж, тоног төхөөрөмж



нийлүүлснээр уг эмнэлгийн үйл ажиллагаа өргөжин тэлж, Өмнөговийн олон сумын ард иргэдэд чанартай, хүртээмжтэй үйлчилгээ үзүүлэх нөхцөл боломж бүрдсэн байна.

ӨВӨЛЖИЛТИЙН ХЭРЭГЦЭЭНИЙ ДЭМЖЛЭГ

Энержи Ресурс компани нь “Сайн хөрш” хөтөлбөрийн хүрээнд орон нутгийн төрийн болон ТББ-ууд, оролцогч талуудтай тасралтгүй хамтын ажиллагаа хөгжүүлж ирсэн.

Энэхүү хөтөлбөрийн хүрээнд уламжлал болсон ажлын нэг нь орон нутагт үнэ төлбөргүй өвөлжилтийн хэрэгцээний нүүрс нийлүүлдэг явдал юм. 2009 оноос хойш жил бүр Өмнөговь аймгийн Даланзадгад болон Ханбогд, Ханхонгор, Баян-Овоо сумдад өвөлжилтийг өнтэй давахад зориулан эрчим хүчний нүүрс үнэ төлбөргүй нийлүүлж ирсэн. Тайлант онд Өмнөговь аймгийн ЗДТГ-аас ирүүлсэн хүсэлтийн дагуу 20,000 тонн нүүрс үнэ төлбөргүй нийлүүлэх гэрээ

хийж улмаар Баяндалай, Мандал-Овоо, Номгон, Булган, Манлай, Номгон, Цогтцэций, Цогт-Овоо, Даланзадгад зэрэг сумдыг өвөлжилтийн хэрэгцээний нүүрсээр хангасан.

Мөн Өмнөговь аймгийн Дулааны цахилгаан станц, Ханхонгор сумын “ЭЛКО” эрчим хүчний компани, Өмнөговь аймгийн ЗДТГ-тай тус тус нүүрс нийлүүлэх гэрээ байгуулж, Даланзадгадын Дулааны станцад 24,000 тонн, Ханхонгорт 1,000 тонн, ЗДТГ-т гэрээний дагуу нийт 1,000 гаруй тонн буюу нийт орон нутгийн хэмжээнд 26,000 тонн нүүрс нийлүүлж ажиллалаа.

“ОЙН ЗУРВАС” ТӨСӨЛ



Орон нутгийн жижиг, дунд бизнесийг дэмжих хөтөлбөрийн хүрээнд өрхийн орлогыг нэмэгдүүлэх, газар тариалан эрхлэлтийг дэмжих урт хугацааны бодлогоор газар тариалангийн “Ойн зурвас” төслийг 2011 онд эхлүүлсэн. Энэхүү салхины хамгаалалтын зурвас нь одоогийн байдлаар 10 га талбайг эзлэх бөгөөд дунд нь 4га газар тариалангийн талбай бий болгож, Цогтцэций сумын ЗДТГ-тай хамтран ажиллаж байна.

Төслийн гол зорилго нь сумын иргэд болон шилжин

суурьшсан ажиллагсдын гэр бүлийн гишүүдийн газар тариалан эрхлэх санаачилгыг дэмжих, туршлага, ур чадварыг нэмэгдүүлэх, нутгийн хөрсөнд ургуулсан эрүүл төмс, хүнсний ногоогоор өрхийн хэрэгцээгээ хангахад нь дэмжлэг үзүүлэх, цаашлаад өрхийн бизнесийг дэмжиж, орлогыг нэмэгдүүлэх, орон нутгийн хүнсний ногооны зах зээлийн тодорхой хувийг хангахад туслалцаа үзүүлэх явдал юм.

Тайлант онд ногоочдыг хамтран ажиллах, бүлэг болж хамтын хүчээр асуудлаа шийдвэрлэхэд нь дэмжлэг үзүүлэх, цаашид энэхүү санаачилга дээрээ тулгуурлан бизнес хийх боломжийн талаар сумын ЗДТГ-ын мэргэжилтэнтэй хамтран чиглүүлэх ярилцлага, уулзалтуудыг зохион байгууллаа.

Уулзалтын үр дүнд ногоочид хамтран үр суулгацаа худалдан авч, бууц бордоогоо татан авах, ногооны талбайн хашааг засварлах, усалгааны нэмэлт хэрэгслүүдээ дундын хөрөнгөөр шийдэн ажиллаж бүлэг болж хамтран ажиллах эх суурь тавигдсан юм. Өнгөрөгч онд “Ойн зурвас” төслийн хүрээнд нийт 60 гаруй өрх төмс, хүнсний ногоо тариалсан байна.

УРГАЦЫН БАЯР

“Ойн зурвас” төсөлд хамрагдан төмс, хүнсний ногоо тариалсан орон нутгийн иргэд жил бүрийн намар ногоогоо хурааж ургацын баяраа хийдэг уламжлалтай.

Сүүлийн хоёр жил ургацын баярын арга хэмжээ улам бүр өргөжин сумын ЗДТГ-аас зохион байгуулдаг намрын үзэсгэлэн худалдаатай хамтатган хийдэг болжээ.

Энэхүү төсөл нь одоогоос таван жилийн өмнө “Цогтцэций суманд хүнсний ногоо тарихад хүндрэлтэй, боломжгүй” гэсэн ойлголттой байсан ард иргэдийн үзэл хандлагыг өөрчилж чадсан онцлогтой.

Нутгийн хөрсөнд ургуулсан амт чанартай төмс, хүнсний ногоогоор өрхийн хэрэгцээгээ хангаад зогсохгүй орон нутгийн зах зээлд тодорхой хэмжээний борлуулалтыг хийж өрхийн орлогоо нэмэгдүүлж байгаа нь уг төслийн бодит үр дүн билээ.



Цаашид ногоочид бүлэг, хоршоо болон хамтран ажиллаж илүү арвин ургац авч, өрхийн бизнес болгон хөгжүүлэх боломжтой юм.

“МӨРӨӨДӨЛ” БОЛОВСРОЛЫН ЦОГЦОЛБОР



Энержи Ресурс компани нь 640 хүүхдийн сургууль, 144 хүүхдийн цэцэрлэг, 100 хүүхдийн дотуур байр бүхий “Мөрөөдөл” цогцолборыг Өмнөговь аймгийн ЗДТГ-тай хамтран санхүүжүүлж, барьж байгуулсан.

Түүнчлэн компанийн зүгээс тус сургуульд сургалтын жишиг хөтөлбөр, стандарт хангасан сургалтын менежментийг нэвтрүүлэх төслийг улсын тэргүүний “Орчлон” сургуультай хамтран хэрэгжүүлснээр сургалтын менежментийн хамгийн орчин үеийн аргачлал нэвтэрч, англи хэлийг эх хэлний түвшинд эзэмшүүлэх DynEd

хөтөлбөр амжилттай хэрэгжсэн юм.

Тайлант онд уг төслийн хугацаа дуусгавар болсонтой холбогдуулан гэрээг дүгнэж, төслийн үр дүн, тайланг оролцогч талуудад танилцуулан гэрээг албан ёсоор хаалаа.

Тус цогцолбор байгуулагдаж, тусгай хөтөлбөр

хэрэгжсэнээр Цогтцэций сумын сурагчдын боловсролын чанарт илт ахиц гарч, төгсөгчдийн чанарын үзүүлэлтээр аймагтаа төдийгүй улсдаа дунджаас дээгүүр бичигдэх байгаа. Мөн сумын сурагчид улс, аймгийн олимпиадуудад маш өндөр амжилт үзүүлэх болсон.

“ЗУЗААХАЙ” ЦЭЦЭРЛЭГ

Ороннутагдахьнийгмийнсуурьүйлчилгээнийхүртээмж, боловсролын үйлчилгээний чанарыг нэмэгдүүлэхэд хувь нэмэр оруулах, компанийн ажиллагсдын хүүхдүүдэд сургуулийн өмнөх боловсрол эзэмших нөхцөл боломжийг бүрдүүлэх зорилгоор Энержи Ресурс компаниас “Зузаахай” цэцэрлэгийг 2011 онд байгуулсан. Уг цэцэрлэг нь 144 хүүхдийн багтаамжтай бөгөөд хүмүүжигч хүүхдүүдийн төлбөрийн 50 хувийг компани хариуцаж ирсэн.

Тайлант онд Өмнөговь аймгийн Засаг даргатай Хамтын ажиллагааны санамж бичиг байгуулсны дагуу тус цэцэрлэгийг 85 сая төгрөгийн үнэ бүхий иж бүрэн тоног хэрэгсэл, эд хөрөнгийн хамтаар орон нутагт хандивлаж, улсын статустай цэцэрлэгийн харьяа болгон хүлээлгэж өгсөн.



СОЁЛЫН ӨВИЙН ХАМГААЛАЛ – “ЦЭЦИЙН ЖОНОН” ХАМТЛАГ



Энержи Ресурс компаниас соёлын өвийг хадгалах, хамгаалах хөтөлбөрийн хүрээнд орон нутгийн хүүхэд багачуудын дунд морин хуурын сургалт явуулж, улмаар “Цэцийн Жонон” морин хуурын хамтлагийг үүсгэн байгуулж, хөгжим болон хувцас хэрэгслээр хангасан бөгөөд энэхүү хамтлаг нь 2013 оноос хойш сумын соёлын төвийн дэргэд харьяалагдан үйл ажиллагаа явуулж байна.

Тайлант онд тус хамтлаг нь “Өсвөрийн морин хуурчдын уралдаан”-д хамтлаг болон гоцлол төрлөөр амжилттай оролцжээ. “Цэцийн Жонон” хамтлагийнхан аймаг, орон нутагт зохиогдож буй урлаг, соёлын олон арга хэмжээнд идэвхитэй оролцон уран бүтээлээ олны хүртээлд хүргэж, говь нутгийн соёлын өв болсон бүтээлүүдийг түгээн дэлгэрүүлэхэд хувь нэмрээ оруулсаар байна.

ӨНДӨР НАСТНУУДАД ХҮНДЭТГЭЛ ҮЗҮҮЛЭХ АРГА ХЭМЖЭЭ

Энержи Ресурс компани жил бүрийн Сар шинийн баяр болон Ахмадын баярыг угтан орон нутгийн өндөр настнуудыг хүлээн авч, хүндэтгэл үзүүлэн үнэт сургаалийг нь сонсдог сайхан уламжлалтай.

2016 оны арваннэгдүгээр сард Ухаа Худаг уурхайн удирдлагууд Цогтцэций сумын Ахмадын хороотой хамтран сумын өндөр настнуудад хүндэтгэл үзүүлэх арга хэмжээг зохион байгуулж, тус сумын 70-аас дээш настай 100 орчим ахмадад хүндэтгэл үзүүлэн, гарын бэлэг гардуулсан юм.



АЖЛЫН БАЙР



ХҮНИЙ НӨӨЦИЙН БОДЛОГО, БАРИМТЛАХ ЗАРЧИМ

Энержи Ресурс компани нь Монгол Улсын Хөдөлмөрийн тухай хууль болон холбогдох бусад хууль тогтоомжийн дагуу ажиллагсдыг хөдөлмөрийн аюулгүй байдал, эрүүл ахуйн шаардлагад тохирсон, ажлын байрны дарамтнаас ангид нөхцлөөр хангах, хөдөлмөрийн үр дүнд нь тохирсон цалин хөлс олгох, нийгмийн даатгалд даатгуулах зэрэг үндсэн заалтуудыг чандлан мөрдөхийн зэрэгцээ Монгол Улсын нэгдэн орсон Олон Улсын Хөдөлмөрийн Байгууллагын конвенц болон тэдгээртэй нийцүүлэн гаргасан хууль тогтоомжийн бусад акт, хамтын гэрээ хэлэлцээрийг дагаж биелүүлдэг.

Ажиллагсад нь компанийн амжилтын гол хүчин зүйл учраас чадварлаг боловсон хүчин, хамт олныг бий болгох, тогтоон барих, сурган хөгжүүлэх нь манай компанийн хувьд чухал ач холбогдолтой байдаг. Энэ утгаараа компанийн зүгээс ажлын байрны эрүүл, аюулгүй орчныг бүрдүүлж, ажиллагсдынхаа нийгмийн асуудлыг шийдвэрлэх, шилжин суурьших нөхцлийг бүрдүүлэх, хувь хүний болон мэргэжлийн хувьд тасралтгүй өсөн дэвжих боломжийг бүрдүүлэхэд онцгой анхаарч, хүний нөөцийн бодлогодоо тусган ажиллаж байна.

АЖЛЫН БАЙР, ТЭГШ БОЛОМЖ

Тус компани нь хариуцлагатай уул уурхайн зарчмуудыг хэрэгжүүлэгчийн хувьд ажиллагсдын эрхийг дээдэлж, тэднийг ижил тэгш боломжоор хангадаг. Ажилтан, ажиллагсдыг сонгон шалгаруулахдаа ажил горилогсдын мэргэжил, ур чадварын түвшинг эн тэргүүнд харгалзан үзэхээс гадна орон нутгийн иргэдийг ажлын байраар хангах чиглэлд онцгой анхаарал хандуулж ирсэн.

Сүүлийн жилүүдэд уул уурхайн салбарын зах зээлийн хүндрэл үргэлжилсэн хэдий ч компанийн зүгээс ажиллагсдынхаа ажлын байрыг хадгалах, тэр дундаа орон нутгийн иргэдийг ажил, орлоготой нь хэвээр байлгах чиглэлд тасралтгүй анхаарч, компанийн бүтэц, зохион байгуулалтыг илүү оновчтой болгон шинэчилсэн.

2016 оны 12-р сарын байдлаар тус компани нийт 1,442 үндсэн ажиллагсадтай байсны 63 хувийг орон нутгийн иргэд, тодруулбал Өмнөговь аймгийн Цогтцэций, Даланзадгад, Манлай, Баян-Овоо, Цогт-Овоо сумын иргэд зонхилон бүрдүүлж байна. Жил ирэх тусам орон нутгийн

ажиллагсдын хувь хэмжээ нэмэгдсээр байгаа нь манай компани орон нутгийн иргэдийг ажил, орлоготой байлгах бодлого, чиглэлд анхаарч ирсний тод илрэл юм.


Компанийн хөдөлмөрийн дотоод журмын дагуу ажилтны нас, хүйс, шашин шүтлэг, улс төрийн үзэл баримтлал, оршин суугаа орон нутаг, харьяалал зэргээс үл хамаарсан цалин, хөлс олгож, тэгш хөгжих боломжийг хангадаг бөгөөд цалингийн зөрүү нь зөвхөн тухайн ажилтны боловсрол, ур чадварын түвшин, туршлага болон зэрэг, дэв зэргээс хамаардаг.

Тайлант онд нийт ажиллагсдын 15%-ийг эмэгтэй ажиллагсад бүрдүүлсэн бөгөөд тэдгээрийн 16% нь менежер болон удирдах түвшинд, 27% нь мэргэжлийн буюу техникийн түвшинд, 57% нь судлаач, инженер, геологич зэрэг мэргэжилтний түвшинд тус тус ажиллаж байна. Насны ангиллаар нь авч үзвэл нийт ажиллагсдын дийлэнхи буюу 65%-ийг 18-35 насныхан, 35%-ийг 36 болон түүнээс дээш насныхан бүрдүүлж байна.


Компанийн ажиллагсдын мэдээлэл

| | 2014/12/31 | 2015/12/31 | 2016/12/31 |
|--|------------|------------|------------|
| 1. Нийт ажиллагсдын тоо | 1,950 | 1,797 | 1,442 |
| 2. Нийт эмэгтэй ажиллагсдын тоо | 296 | 259 | 219 |
| 3. Удирдах түвшний эмэгтэй ажиллагсдын тоо | 15 | 40 | 34 |
| 4. Орон нутгийн ажиллагсдын эзлэх хувь | 40.6% | 45% | 63% |


Эмэгтэй ажиллагсдын эзлэх хувь (2016)




Орон нутгийн ажиллагсдын эзлэх хувь (2016)



Ажиллагсдын насны ангилал (2016)



Эмэгтэй ажиллагсдын албан тушаалын байдал (2016)



НИЙГМИЙН ХАЛАМЖ



Компанийн зүгээс ажиллагсдын цалин хангамж, урамшуулал болон нийгмийн халамжийн чиглэлээр тодорхой бодлого, журмыг хэрэгжүүлэн ажилладаг.

Тус компанийн санхүүгийн нөхцөл байдал, хувь хүний ажлын болон багийн гүйцэтгэлээс хамааран ажиллагсдад гүйцэтгэлийн урамшууллыг тооцон олгодог.

Нийт ажилтнууддаа орон сууц худалдан авахад нь банкны хөнгөлөлттэй зээл олгох, даатгал, эрүүл мэндийн үзлэгт хамруулах, гэр бүлээрээ нүүн суурьшиж буй ажилтнуудын гэр бүлийг ажилд ороход нь дэмжлэг үзүүлэх, мөн ажиллагсдын хүүхдүүдийн сургууль цэцэрлэгийн асуудлыг шийдэхэд нь тусламж, дэмжлэг үзүүлэх зэргээр ажиллагсдын нийгмийн асуудалд нэн тэргүүнд анхаарал хандуулсаар ирсэн.

Ажиллагсдыг суурьшуулах бодлогын хүрээнд Цогтцэций суманд барьж байгуулсан орон сууцны “Цэций” хороололд одоогийн байдлаар 600 орчим ажиллагсад гэр бүлийнхээ хамтаар тохь тухтай амьдарч байна.

Мөн “Уурхайчин” жишиг гэр хороолол, “Зузаахай” цэцэрлэг болон 700 хүүхдийн багтаамжтай “Мөрөөдөл” сургууль, цэцэрлэгийн цогцолборыг барьж байгуулан ашиглалтанд оруулснаар ажилтнууд ар гэрийн нөхцөл, үр хүүхдийнхээ боловсролд санаа зовох зүйлгүйгээр ажлын бүтээмжээ нэмэгдүүлэн ажиллах боломж бүрдсэн юм.

ШИЛЖИЛТ ХӨДӨЛГӨӨН

Тайлант онд нүүрсний зах зээлийн хямрал үргэлжилсэнтэй холбогдуулан компанийн бүтэц, зохион байгуулалтанд өөрчлөлт оруулснаар нийт ажиллагсдын 10 хувийг цомхотгож, холбогдох хууль тогтоомжийн дагуу алхмууд хийгдсэн.

Харин 2016 оны сүүлийн хагас жилд шинээр 102 хүнийг ажлын байраар хангасан бөгөөд ингэснээр ажиллагсдын

шилжилт хөдөлгөөний жилийн үзүүлэлт 20%-тай байна. Компанийн зүгээс ажиллагсдынхаа нийгмийн асуудалд анхаарч, хөнгөлөлт, хангамжийн бодлогоо хэвээр үргэлжлүүлэн, гэр бүлээр нь орон нутагт шилжүүлэн суурьшуулах хөтөлбөрийг хэрэгжүүлэн ажилласан.

2013 оноос хойш нийт 650 ажилтан гэр бүлийн хамтаар орон нутагт шилжин суурьшсан байна.

СУРГАЛТ ХӨГЖИЛ

Компани байгуулагдсан цагаас эхлэн мэргэжилгүй иргэдийг уул уурхайн чиглэлээр мэргэшүүлж, ажлын байраар хангах, ажилтнуудынхаа мэргэжлийн ур чадварыг сайжруулах, хувь хүний ерөнхий ур чадварыг нэмэгдүүлэх, байгууллагын соёлыг төлөвшүүлэх сургалтуудыг тогтмол зохион байгуулсаар ирсэн.

Тайлант онд ерөнхий ур чадварын 1, хүнд машин механизм, оператор, засварчин гэх мэт нарийн мэргэжлийн 14, нийт 15 төрлийн сургалтанд давхардсан тоогоор 329 ажиллагсдыг хамруулжээ.



Сургалтын мэдээлэл (2016)

| | |
|--|-----|
| 1. Нарийн мэргэжлийн сургалтанд хамрагдсан ажиллагсдын тоо | 319 |
| 2. Ерөнхий ур чадварын сургалтанд хамрагдсан ажиллагсдын тоо | 10 |
| 3. Нийт сургалтанд хамрагдсан ажиллагсдын тоо | 329 |

БАЙГАЛЬ ОРЧИН



БАЙГАЛЬ ОРЧНЫ БОДЛОГО, БАРИМТЛАХ ЗАРЧИМ

Энержи Ресурс компани нь үйл ажиллагааныхаа бүхий л үе шатанд ажиллагсдын аюулгүй байдал, эрүүл мэндэд учирч болох сөрөг нөлөөллөөс урьдчилан сэргийлэх, байгалийн баялгийг зохистой ашиглах, нөхөн сэргээх ажилд нэн тэргүүний ач холбогдол өгч, байгаль орчны чиглэлийн холбогдох бүхий л хууль, стандартуудыг мөрдөж ажилладаг. Байгаль орчны менежментийн систем нь компанийн үйл ажиллагаанаас бий болох сөрөг нөлөөллийг арилгах, бууруулах, нөхөн сэргээхэд чиглэгдсэн байдаг.

Энержи Ресурс компани нь Байгаль орчин, хөдөлмөрийн аюулгүй байдал, эрүүл ахуй

(БОХАБЭА)-н хүрээнд олон улсын ISO 14001:2004 “Байгаль орчны удирдлагын тогтолцоо” болон OHSAS 18001:2007 “Хөдөлмөрийн аюулгүй байдал, эрүүл ахуйн удирдлагын тогтолцоо” стандартын шаардлагатай нийцүүлсэн, нэгдсэн удирдлагын тогтолцоог нэвтрүүлэн ажиллаж байна.

Энэхүү нэгдсэн удирдлагын тогтолцоо нь БОХАБЭА-н бодлого, зорилго, зорилт, шаардлага болон тэдгээрт хүрэх арга замыг тодорхойлсон цогц систем тул компаниас хэрэгжүүлж буй бүхий л төсөл, үйл ажиллагаанд хүрч мөрдөгддөг.

ҮЙЛ АЖИЛЛАГАА

Монгол Улсын хууль тогтоомж болон олон улсын банк, санхүүгийн байгууллагуудын шаардлагад нийцүүлсэн байгаль орчны нарийвчилсан үнэлгээг Ухаа Худаг төсөл эхлэхээс өмнө хийж гүйцэтгэн, төслөөс үүдэлтэй байгаль орчинд учирч болохуйц сөрөг нөлөөллийг бууруулах, арилгах, нөхөн сэргээх зорилготой менежментийн төлөвлөгөө боловсруулсан. Энэ хүрээнд Ухаа Худаг уурхайн үйл ажиллагаанд хог хаягдал, ус, тоосжилт, хөрсний элэгдэл, эвдрэл, нөхөн сэргээлт зэрэг чиглэлүүдээр төрөлжсөн менежментийн төлөвлөгөөнүүдийг хэрэгжүүлэн ажиллаж ирсэн.

Мөн оролцогч талуудын чухал төлөөлөл болох орон нутгийн иргэдийн байгаль орчны мэдлэг боловсролыг

дээшлүүлэх зорилгоор сургуулийн сурагчид, нутгийн малчид, иргэдэд ойжуулалт, зүлэгжүүлэлт, хог хаягдлын менежмент, байгалийн нөөцийн зохистой ашиглалтын талаар сургалт явуулж, орчны хяналт шинжилгээнд нутгийн иргэдийг оролцуулж, тэднээр хөндлөнгийн хяналт хийлгэдэг.

Өнгөрсөн онд салбарын нөхцөл, эдийн засгийн хүндрэлтэй байдлаас шалтгаалан уурхай бүрэн хүчин чадлаараа ажиллаагүй хэдий ч байгаль орчны менежмент төлөвлөгөөнд тусгагдсан ажлуудыг аль болох өндөр гүйцэтгэлтэй хэрэгжүүлэхийг зорьж, дараахь ажлуудыг хийж гүйцэтгэсэн.

УСНЫ ЗОХИСТОЙ ХЭРЭГЛЭЭ



Энержи Ресурс компани нь олон улсын жишигт нийцсэн үйл ажиллагаа явуулдаг үндэсний уул уурхайн компани гэдэг утгаараа хариуцлагатай уул уурхай, тэр дундаа усны менежментийн асуудалд онцгой анхаарал хандуулдаг. Ялангуяа цэвэр усаар хомс говь нутгийн байгалийн онцлогийг дээд зэргээр харгалзан үзэж, усны зохистой хэрэглээг чухалчилдаг.

Ухаа Худаг уурхайн цогцолбор нь үйлдвэрлэлийн болон ахуйн хэрэглээний ус хангамжийн ухаалаг, дэвшилтэт системийг нэвтрүүлэн ажилласнаар уурхайн

нийт төслүүдийн усны хэрэгцээг хангадаг. Говь нутгийн ус нь эрдэсжилт, хатуулаг ихтэй учраас ундны усанд тогтмол хэрэглэх нь тохиромжгүй байдаг. Иймд Энержи Ресурс компани ундны усыг цэнгэгжүүлж, Цогтцэций сумын хүн ам болон уурхайн ажиллагсдын хотхоныг эрүүл ахуйн шаардлагад нийцсэн, ундны цэвэр усаар хангаж байна.

Мөн Нүүрс баяжуулах үйлдвэрийн дэргэд Хаягдлыг усгүйжүүлэх үйлдвэрийг байгуулж, үйлдвэрээс гарч байгаа нүүрсний лаг хаягдлаас усыг шавхан, дахин ашиглаж, үйлдвэрийн усны дахин ашиглалтыг 98 хувьд хүргэсэн. Түүнчлэн цахилгаан станцдаа тусгайлан агаарын хөргөлтийн технологи суурилуулсан учраас Монгол дахь бусад цахилгаан станцуудтай харьцуулахад усыг 4–5 дахин хэмнэдэг.

Ухаа Худаг уурхайн усны чанарын лабораторийн үйл ажиллагаа, техник технологи, мэргэжилтнүүдийн чадавхи нь холбогдох шаардлагуудыг бүрэн хангасан учир Монгол Улсын стандарт хэмжил зүйн газраас тус лабораторид итгэмжлэл олгосноор дотоодын хяналтыг өндөр түвшинд, стандартын шаардлага хангасан байдлаар явуулж байна.

УСНЫ МЕНЕЖМЕНТИЙН САЙН ДУРЫН КОДЕКС

Олон улсын санхүүгийн корпорациас уул уурхайн компаниудтай хамтран “Өмнийн говийн ус ба уул уурхай” сэдэвт дугуй ширээний уулзалтыг тогтмол зохион байгуулдаг бөгөөд дугуй ширээний уулзалтын гишүүд хамтран “Усны менежментийн сайн дурын кодекс” боловсруулж, энэхүү баримт бичигт Энержи Ресурс компани мөн нэгдэн орсон.

Кодекст нэгдэн орсноор компанийн зүгээс усны менежментийн чиглэлээр хийж хэрэгжүүлж буй ажлынхаа тайлан, мэдээллийг нэгтгэн тогтмол хүргүүлж байна.

Мөн тайлант онд кодекс нэгдэн орсон компаниудын



усны менежментийн чиглэлээр явуулж буй үйл ажиллагаа, туршлагыг танилцуулах зорилготой “Уул уурхай ба усны менежмент” сэдэвт баримтат киноны төсөлд Энержи

Ресурс компани сонгогдон оролцож, хөндлөнгийн хяналт, мониторингийн ажилд орон нутгийн иргэдийг хэрхэн оролцуулдаг туршлагаасаа хуваалцлаа.

НӨХӨН СЭРГЭЭЛТИЙН ТУРШИЛТЫН ТАЛБАЙ



Байгаль орчны нөхөн сэргээлтийн туршилтын талбайд олон төрлийн мод, бут, сөөг, нутгийн болон олон наст ургамлыг туршилтын журмаар ургуулан, тухайн бүс нутагт

хамгийн сайн зохицсон ургамлыг сонгон шалгаруулж, улмаар биологийн нөхөн сэргээлт болон орчны тохижилтод ашигладаг.

Тайлант хугацаанд туршилтын талбайд сухайны мөчир 2,000 ширхэгийг бэлтгэж, жигд, харгана, шар хуайсыг тарьж ургуулсан бөгөөд өмнөх жилүүдэд тарьсан, бойжуулгын хэсэгт ургаж байгаа хайлаас, сухай, харганы өсөлт хөгжлийг хэвийн явуулах зорилгоор графикийн дагуу усалгаа арчилгааг тогтмол хийсэн байна. Уг талбайгаас бэлтгэсэн 3,025 ширхэг тарьц суулгацыг элэгдэл эвдрэлд орсон талбайг ургамалжуулах, төслийн талбайн ногоон байгууламжийг нэмэгдүүлэх зорилгоор төлөвлөсөн цэгүүдэд тарьж ургууллаа.

Мөн мод үржүүлгийн талбайгаас ирэх жилийн тарилтанд ашиглах буйлс, жигд, харганы үрийг түүж бэлтгэсэн.

ШИМТ ХӨРСНИЙ ОВООЛГЫН УРГАМАЛЖУУЛАЛТ

2015 онд уурхайн шимт хөрсний овоолгын 1.4 га талбайд ургамалжуулалтын ажил хийсний дагуу тайлант онд уг талбайд нөхөн тарилт хийж, усалгаа арчилгааг тогтмол явуулсан. Нөхөн тарилтанд говь хээрийн хуурай уур амьсгалтай нөхцөлд ургах чадвартай буурцагт ургамлын төрөл зүйл болох шар царгас болон хүцэнгийн холимог үрийг ашигласан байна.

Буурцагт ургамал нь хөрсний шим тэжээлийн элемент, азотыг баяжуулдаг тул шимт хөрсний овоолго дээр тарихад хамгийн тохиромжтой байдаг. Мөн нөхөн тарилтын ажлын хүрээнд мод үржүүлгийн талбайгаас 50 ширхэг үетэн шилжүүлэн суулгаж ургуулах туршилтын ажил хийсэн. Ургамалжуулсан талбайн бүрхэц 80%-д хүрсэн бөгөөд



усалгааг сайжруулах үүднээс цахилгаан, автомат насос шинээр тавьж суурилуулав.

НОГООН ОРЧИН



Шаардлагагүй шороон замуудыг хааж, нөхөн сэргээлт хийн, замын нэгдсэн сүлжээг ашигласнаар хөрсний элэгдэл эвдрэл, тоосжилт зэрэг байгаль орчинд үзүүлэх сөрөг нөлөөллийг бууруулахаас гадна ногоон байгууламжийн талбайг нэмэгдүүлэх, амьтдын амьдрах орчныг бий болгох зэрэг чухал ач холбогдолтой байдаг.

Тайлант онд ажилчдын хотхоноос төслийн талбай хүртэлх хатуу хучилттай зам дагуух талбайнуудыг хашаажуулж, усалгааны систем, усны нөөцлүүр суурилуулан, нөхөн тарилтын ажлыг зохион байгууллаа. Уг ажлын хүрээнд нийт 8,500 м² талбайд хайлаас, сухай,

жигд нийлсэн 1,050 суулгацыг тарив. Зам дагуу тарьсан моддыг хамгаалалтын хашаатай болгож, усалгааны систем суурилуулж усалгаа арчилгааг тогтмол явуулсны дүнд моддын ургалт, өсөлт сайн байна.

ХОГ ХАЯГДЛЫН МЕНЕЖМЕНТ



Ухаа Худаг уурхайд хог хаягдлын менежментийг хэрэгжүүлэхдээ “3R+R” системийг ашигладаг. Тухайлбал, ангилан ялгасан хог хаягдлыг дахин ашиглаж бүтээгдэхүүн

Мөн Тавантолгой нисэх онгоцны буудал орчмын хатуу хучилттай зам дагуух хуучин шороон замуудыг хааж мод тарин, нөхөн сэргээлт хийлээ.

үйлдвэрлэдэг дахиврын цехийг тогтмол ажиллуулж, блок, хашаа, сандал, хогийн сав зэрэг олон нэр төрлийн бүтээгдэхүүн үйлдвэрлэдэг. Мөн төслийн нийт талбайн хэмжээнд их цэвэрлэгээг тогтмол зохион байгуулж, хоггүй цэвэр орчныг бүрдүүлэн ажиллаж байна.

Тайлант онд байгаль орчны удирдлага зохион байгуулалтын ажлын хүрээнд төслийн үйл ажиллагаанд мөрдөгддөг байгаль орчны дотоод журмууд болох хог хаягдлын менежментийн журам, асгаралтын хариу арга хэмжээний журам, химийн бодисын менежментийн журам болон орчны хяналт шинжилгээний ажлын журмыг тус тус шинэчлэн боловсруулсан.

Дээрхи журмуудыг шинэчлэн боловсруулснаар тэдгээр журмаар зохицуулагдах асуудлууд болон үүрэг хариуцлага илүү нарийн тодорхой болж, байгаль орчны ажлын гүйцэтгэл улам сайжрах ач холбогдолтой юм.

УСТ ЦЭГҮҮДИЙН АРЧИЛГАА

Төслийн ойролцоо бүсэд байрлах уст цэгүүдийн хатуу хог хаягдлыг цэвэрлэх ажлыг жил бүр зохион байгуулсаар ирсэн бөгөөд энэ удаа Мухар гашуун, Хармагтайн уст цэг болон Адгийн ус, Хулсан ус, Маахууз зэрэг худгуудын ойр орчмын хатуу хог хаягдлыг цэвэрлэлээ. Уг цэвэрлэгээгээр 2 м³ орчим ахуйн хатуу хог хаягдлыг түүж, сумын нэгдсэн хог хаягдлын цэгт тээвэрлэн хүргэсэн байна.

Мөн “Хог бүү хая” самбарыг Мухар гашууны Хужир хонхор, Гэгээнтний овоо болон Хулсан усны худгууд дээр байрлуулсан. Уст цэгийн тохижилтын ажлын хүрээнд орон нутгийн иргэдийн хүсэлтээр Адгийн ус худгийг тохижуулж, Цагаан-Овоо багийн засаг дарга болон иргэн н.Цогтбаатар нарт хүлээлгэн өгсөн. Уг худаг нь сумаас Улаанбаатар хот хүрэх төв замын дэргэд байрладаг бөгөөд явуулын хүмүүс хог хаягдлаар бохирдуулсан, таггүй, онгоц ашиглах



боломжгүй байсан зэргийг засч сэлбэн, ашиглахад хялбар болгосон.

БАЙГАЛЬ ОРЧНЫ ХЯНАЛТ, ҮНЭЛГЭЭНД ИРГЭДИЙН ОРОЛЦОО

2011 оноос компанийн Байгаль орчны баг ба Орон нутгийн харилцааны баг хамтран нутгийн иргэдэд байгаль орчны хяналт шинжилгээний ажлыг танилцуулах, байгаль орчны хээрийн хэмжилтэнд иргэдийг оролцуулах, хэмжилтийн бодитой мэдээллийг иргэдэд өгөх зорилготой сургалт, танилцуулгын ажлыг зохион байгуулж ирсэн. Энэ ажлын хүрээнд иргэд компанийн байгаль орчны бодлого

болон байгаль хамгаалах ажлын талаарх мэдээллийг тогтмол авч, малчдын худгаас усны дээж авч шинжилгээ хийх, усны түвшин хэмжих, орчны тоосжилтын хэмжилт хийх, дуу шуугианы хэмжилт хийх ажилд биечлэн оролцож байна.

2016 онд Цогтцэций сумын төрийн байгууллагын ажилтнууд, малчид, “Цэций” хорооллын оршин суугчдын

төлөөлөл зэрэг иргэд, олон нийтэд байгаль орчны хяналт шинжилгээний ажлыг танилцуулж, худгийн усны болон тоосны хэмжилтийг газар дээр нь хийж үзүүлэн, хэмжилтийн бодит үр дүнг танилцууллаа.

Ийнхүү хамтын оролцоотой мониторингийн ажлыг тогтмолжуулснаар компани болон орон нутгийн иргэд, бусад оролцогч талуудын харилцан итгэлцэл нэмэгдэх, бүх оролцогч талууд нэгдсэн ойлголтонд хүрэх чухал ач холбогдолтой юм.



ЗЭРЛЭГ АМЬТДЫГ ХАМГААЛАХ АЖИЛЛАГАА



Байгаль орчныг хамгаалах төлөвлөгөөт ажлын хүрээнд зэрлэг амьтдыг хамгаалах биотехникийн арга хэмжээ хэрэгжүүлэх зорилгоор “Цэций хайрхан” ууланд өвс тэжээл,

мөс тавих арга хэмжээг жил бүр зохион байгуулсаар ирсэн.

Тайлант онд Цогтцэций сум орчмын нутгаар алаг цоог цасан бүрхэвчтэй байсан тул зэрлэг амьтдад хужир тавьж өгөх ажлыг зохион байгууллаа. Зэрлэг амьтад хужирсахгүй байх нь тарга тэвээрэг алдахгүй байх, өвлийг мэнд давах, тухайн газар нутагтаа тогтвортой байрлахад эерэг нөлөөтэй юм.

Уг ажлын хүрээнд сумын байгаль хамгаалагчидтай хамтран 300 орчим кг хужрыг Мухар гашууны хөндийгөөс авч, Цэций хайрхан уулын аманд хуваан байршуулав. Хужрыг тавихдаа зэрлэг амьтдын ул мөр бүхий жим, хэвтэшийн ойролцоох газруудыг сонгосон. Уг ууланд 10 гаруй тооны янгир мөн тооны аргаль амьдардаг болохыг өмнөх жилүүдийн ажиглалтаар олж тогтоосон бөгөөд эдгээр зүйл амьтад нь Монгол Улсын ховор амьтдын Улаан номонд багтсан нэн ховор туурайтан амьтад юм.

ЗЭРЛЭГ АМЬТДЫГ УНДААЛАХ УСТ ЦЭГ

Компанийн ажиллагсдын санал, санаачлагаар “Цагаан хад” кэмпээс 5 километрийн зайд хиймэл уст цэгийг байгуулжээ. Учир нь уг газрын ойр орчимд зэрлэг ан амьтад цангаагаа тайлахуйц усны нөөц огт байдаггүй юм байна.

Энержи Ресурс компанийн ажиллагсад хиймэл уст цэг дээр тогтмол очиж зориудаар ус хийж бэлдсэнээр уг цооногноос хулан, хар сүүлт, зээр, бор гөрөөс гэх мэт амьтад ундаалж, өлдөж харангадахын аюулгүй болсон. Их говийн эзэд болсон ан, амьтдыг хайрлан хамгаалах нь компанийн төдийгүй иргэн бүрийн үүрэг, хариуцлага болсны тод жишээ энэ юм.



ШУВУУДАД ЗОРИУЛСАН ХИЙМЭЛ ҮҮР

Ухаа Худаг уурхай орчмын бүс нутагт амьдардаг өдрийн болон шөнийн идэвхит махчин шувуудын амьдрах орчныг дэмжих зорилгоор анх 2013 онд 10 ширхэг шувууны хиймэл үүр хийж байрлуулсан бөгөөд жил бүр хиймэл үүрэнд шувууд үүрлэсэн, суусан байдалд ажиглалт, тандалт судалгаа хийдэг. Хээрийн махчин шувууд идэш тэжээл элбэг ч байгалийн үүрлэх байр ховор байвал тэдгээрийн тоо толгой тогтвортой байх, өсөж үржих нөхцөл боломж нь хязгаарлагддаг.

Мөн зарим төрлийн шувууд өөрөө үүр засдаггүй ба хад асга, модонд өөр төрлийн шувуудын зассан бэлэн үүрэнд үүрлэдэг. Ийм төрлийн шувууд сүүлийн жилүүдэд өндөр хүчдэл дээр сууж, цахилгаанд цохиулан олноор эрсдэх тохиолдол манай орны

хэмжээнд элбэг гарах болсон. Тиймээс идэш тэжээл элбэг газарт хиймэл үүр хийх нь шонхор, сар зэрэг хээрийн махчин шувуудын өсөлт, үржилтэнд ихээхэн ач холбогдолтой юм.

Түүнчлэн бэлчээрийн хөнөөлт мэрэгчдийн зохистой тоо толгойг хадгалахад махчин шувуудад зориулсан хиймэл үүр чухал хэрэгцээтэй. Энэ онд Сэвхүүл болон Мухар гашуунд байрлуулсан үүрэнд хийсэн удаа дараагийн ажиглалтаар тэнд шувууд үүрлэсэн, байрласан ул мөр илэрсэн бөгөөд Дугантанд байрлуулсан үүрэнд шувуу үүрлэн өндгөө дарж байсныг тогтоосон. Иймд шувууд амьдрахад тохиромжтой нөхцлийг улам илүү бүрдүүлэх зорилгоор үүрнүүдийн дотор шороо асган, өвсөөр хучилт хийсэн юм.

ХӨДӨЛМӨРИЙН АЮУЛГҮЙ БАЙДАЛ, ЭРҮҮЛ АХУЙ



ХӨДӨЛМӨРИЙН АЮУЛГҮЙ БАЙДАЛ, ЭРҮҮЛ АХУЙН БОДЛОГО, БАРИМТЛАХ ЗАРЧИМ

Уул уурхайн салбарын хувьд хөдөлмөрийн аюулгүй байдал (ХАБ) нэн чухал асуудалд тооцогддог. Энэ ч утгаараа ажиллагсдынхаа аюулгүй байдал, эрүүл мэндийн асуудлыг чухалчлан үзэж, эрүүл, аюулгүй ажлын орчин бий болгох нь Энержи Ресурс компанийн эрхэм зорилго байдаг. Нийгмийн өмнө хүлээсэн хариуцлагаа ухамсарлан, нийт ажиллагсдаа эрүүл, аюулгүй орчинд ажиллуулахаас гадна, өөрийн үйл ажиллагааны хүрээнд оролцогч бүх талуудын аюулгүй

байдлыг олон улсын стандарт, жишигт нийцүүлэн хангахыг эрмэлздэг.

Энержи Ресурс компани нь Ухаа Худаг уурхайн үйлдвэрлэлийн бүхий л үе шатанд ажиллагсад, гэрээт гүйцэтгэгч болон олон нийт, орон нутгийн иргэдийн эрүүл мэнд, аюулгүй ажиллагааны шаардлагад нэн тэргүүний ач холбогдол өгч “Аюулгүй эхэлж, аюулгүй дуусгая” уриаг эрхэмлэн ажиллаж ирсэн.

ҮЙЛ АЖИЛЛАГАА

Тус компанийн ХАБ-ын нэгж нь Ухаа Худаг төслийн хүрээнд олон улсын OHSAS 18001:2007 “Хөдөлмөрийн аюулгүй байдал, эрүүл ахуйн удирдлага”-ын тогтолцоог нэвтрүүлэн ажилладаг. Тайлант онд дээрх стандарт, удирдлагын тогтолцооны хүрээнд дагаж мөрдөх журам, баримт бичгүүдийг бусад алба, хэлтэстэй хамтран дахин шинэчлэн боловсруулж, батлууллаа.

Мөн 2016 онд уурхайн аваар устгах төлөвлөгөө, цацрагийн аюулгүй ажиллагааны дотоод журам,


хөтөлбөрийг шинэчлэн боловсруулж Онцгой Байдлын Ерөнхий Газар, цөмийн болон цацрагийн хяналтын улсын ахлах байцаагчаар хянуулан тус тус батлуулсан байна.

Тайлант онд ноцтой осол гэмтэл гараагүй, мөн Хугацаа алдсан гэмтлийн давтамж (LTIFR) 0.34 нэгжтэй гарсан нь өмнөх оныхоос 43.3%-аар буурсан үзүүлэлт бөгөөд ХАБ-ын стандартууд, дүрэм журмуудыг өндөр түвшинд мөрдөн ажилласныг илтгэж байна.

ХАБ-ын гол үзүүлэлтүүд (2014-2016)

| Үзүүлэлт | 2014 | 2015 | 2016 |
|---|-----------|-----------|-----------|
| Нийт ажилласан хүн/цаг | 5,643,141 | 3,330,938 | 2,971,720 |
| Эндэгдэл | 2 | 0 | 0 |
| Нийт гэмтлийн давтамж | 5.32 | 2.7 | 4.37 |
| LTIFR | 1.24 | 0.6 | 0.34 |
| Хууль, журамд нийцэж ажилласан байдал | 87% | 87.2% | 88.7% |
| Алдсан хоногийн давтамж (ажиллаагүй хоног/ажилласан цаг) | 0.000158 | 0.0000282 | 0.0000185 |
| ХАБ-ын сургалт, зааварчилгаа | 12,681 | 5,202 | 5,629 |

СУРГАЛТ



Компанийн хэмжээнд хүлээсэн үүрэг хариуцлагын хүрээнд “Ослын давтамжийг тэглэх” зорилтыг дэвшүүлэн ажиллаж байгаа бөгөөд Хөдөлмөрийн чадвар түр алдалтын давтамжийн тоон үзүүлэлтээр тооцож үзвэл тайлант онд энэхүү гүйцэтгэлийн дүн сайн гарсан.

Энэхүү гүйцэтгэл нь Хөдөлмөрийн аюулгүй байдал, эрүүл ахуй (ХАБЭА)-н удирдлагын тогтолцооны олон улсын ангиллын хэрэгжилт дээр тулгуурласан байдаг.

Тайлант хугацаанд нийт ажиллагсад, гэрээт гүйцэтгэгчид болон зочид гэх мэт нийт 7,264 хүнд энэ чиглэлийн тусгай материал танилцуулах сургалтыг хүргэж, үүнд нийт 19,282.7 хүн/цаг зарцуулсан байна.

ХЯНАЛТ, ҮЗЛЭГ

ХАБ–ын хүрээнд ажлын байрны эрсдлийн үнэлгээ хийх, хөдөлмөрийн нөхцлийг тодорхойлох, нийт ажиллагсдад ХАБЭА–н сургалт зохион байгуулах, ажлын байрны үзлэг тогтмол хийх, зөрчлийг арилгуулах, ослын судалгаа хийх гэх мэт ажлууд компанийн хэмжээнд тогтмол явагддаг.

2016 онд ажлын байрны аюулгүйн үзлэгийг нийт 198 удаа зохион байгуулж, бүх илэрсэн аюул болон үл тохирлуудын шалтгааныг судалж, дутагдал зөрчлийг арилгахад шаардлагатай бүхий л арга хэмжээг авч ажилласан.

Мөн ажиллагсдад зориулсан ХАБЭА, аюулгүй ажиллагаа, осол, эрсдлийн менежмент, анхны тусламжийн сургалт, зааварчилгаанууд тогтмол хийгдэж байна.

Компанийн нийт ажиллагсдын дунд өдөр тутмын аюулгүй байдлыг хангаж ажиллах, аюулыг арилгах,



багасгахын тулд тайлангийн хугацаанд ажлын аюулгүй байдлын дүн шинжилгээ, ажлын байрны ХАБЭА–н эрсдлийн үнэлгээг хийлгэж хэвшүүлсэн.

ТОВЧ ДҮГНЭЛТ



Хэдийгээр 2016 оны хувьд уул уурхайн салбарын хямрал үргэлжилсэн, амаргүй жил байсан ч компанийн зүгээс бүтэц, зохион байгуулалтын оновчтой хэлбэрт шилжих, бүтээмж дээшлүүлэх, зардал бууруулах зэргээр үйл ажиллагаагааныхаа тогтвортой байдлыг хангахад анхаарч ажилласнаар жилийн дүнгээр нийт 53 тэрбум төгрөгийг татвар, шимтгэл хэлбэрээр улс, орон нутгийн төсөвт төвлөрүүлж, хүндрэлтэй байгаа улс орны эдийн засагт өөрийн бодитой хувь нэмрийг орууллаа.

Тайлант онд онцлох үйл явдлуудын нэг нь тус компанийг олон улсын хөрөнгө оруулагчид бүрэн дэмжиж, итгэл үзүүлснээр зээлийн бүтцийн шинэчлэлийг бонд эзэмшигчдийн 94-өөс дээш хувь нь дэмжиж, гарын үсэг зурсан явдал байлаа. Ийнхүү компани зээл, төлбөрийн асуудлаа амжилттай шийдвэрлэж чадсанаа олон нийтэд албан ёсоор мэдэгдсэн.

Мөн онд Ухаа Худаг дахь Монголын анхны Нүүрс баяжуулах үйлдвэр 40 сая дахь тонн нүүрсээ хүлээн авсан түүхэн мөч тохиож, Монголын аж үйлдвэржилтийн түүхэнд нэгэн шинэ хуудас нэмсэн. Түүнчлэн Японы Сумитомо групптэй хамтарч, Тавантолгойн баяжуулсан нүүрсийг Япон, Солонгос гэх мэт далайн чанадын гуравдагч зах зээлд хүргэх

хамтын ажиллагааны санамж бичигт гарын үсэг зурснаар Монгол нүүрсийг олон улсын зах зээлд өрсөлдөхүйц байдлаар хүргэх томоохон ажлын эх суурийг тавиад байна.

Компанийн зүгээс ажиллагсдын, тэр дундаа орон нутгийн болон шилжин суурьшсан ажиллагсдын ажлын байрыг аль болох хадгалах, тэдний нийгмийн баталгааг хангах тал дээр анхаарч, өөрсдөөс шалтгаалах бүхий л арга хэмжээг шат дараатай авч хэрэгжүүлж байна. Мөн оролцогч талуудтай хамтран орон нутгийн хөгжлийг дэмжих хөтөлбөр төслүүд, уламжлал болж хэвшсэн ажлуудыг хэвийн үргэлжлүүлэх замаар нийгмийн хариуцлагаа ханган ажиллалаа.

Энержи Ресурс компани нь сүүлийн хэдэн жил үргэлжилсэн зах зээлийн хямралын шуургыг давж туулан, олон сорилт бэрхшээлийг ардаа орхиж чадсан бөгөөд цаашид оролцогч талуудтай хамтын ажиллагааг үргэлжлүүлэх, бататгах замаар орон нутаг төдийгүй улс орны тогтвортой хөгжил, эдийн засгийн өсөлтөнд бодит хувь нэмрээ оруулах, улмаар олон улсын зах зээлд Монголын брэнд болсон нүүрс, нүүрсэн бүтээгдэхүүн борлуулах дэлхийн түвшний үйлдвэрлэгч компани байх зорилтоо хадгалан ажиллаж байна.